



ՀԱԿՈՒԲ ԾԱՅՐԱԳՈՒՅՆ ՎԱՐԴԱՊԵՏ ԳԸՆՃՅԱՆ

ՄԱՐՏԻՆ ԼՈՒԹԵՐԻՆ ԿԱՆԽՈՂ ՄԻ ՔԱՆԻ ԵԿԵՂԵՑԱԿԱՆ ՆՇԱՆԱՎՈՐ ԲԱՐԵԿԱՐԳԻԶՆԵՐ

1054 թ. լատինական և հունական եկեղեցիների միջև գոյություն ունեցող տարակարծություններն ու վեճերը պատճառ դարձան այդ եկեղեցիների պաշտոնական և վերջնական բաժանման, այսինքն՝ հարաբերությունների ամբողջական խզման: Երկուստեք կատարվեցին մեղադրանքներ, և նըպովներ արձակվեցին միմյանց դեմ: Այնուհետև լատինական կամ արևմտյան հերձվածը իրեն վերապահեց «կաթոլիկ» լինելու հանգամանքը, մի բան, որ իրականության բնավ չի համապատասխանում. սակայն մյուս եկեղեցիներից զանազանվելու համար հետըզհետե ընդհանրացավ նրա սեփականացրած այս անվանման կիրառությունը:

Ժամանակի ընթացքում այս կաթոլիկ եկեղեցում զգալի էր դառնում բարենորոգումներ անելու անհրաժեշտությունը. առ այդ գրեթե ոչինչ չէին կարողացել անել Պիպայի, Կոնստանցի, Բազելի և նույնիսկ Լատերանի Ե ժողովները: Մի կողմից Հռոմի պապը չէր ուզում վիճել իր հոգևոր իշխանության գերագահ դիրքը հանդեպ աշխարհիկ իշխանությունների և իրեն համարում էր «երկրային աստված», մյուս կողմից էլ պաշտոնների վաճառքը, ընչաքաղցությունը, եկեղեցական խորհուրդների և ծեսերի չարաշահումը, սնտոխապաշտությունն ու սրբերի հաճախ կեղծ մատուցների նկատմամբ հրահրված պաշտամունքը՝ ապականել էին եկեղեցա-

կանների և եկեղեցական իշխանավորների մեծագույն մասին: Վանականության մեջ զգալի էին դարձել անբարոյականությունն ու տգիտությունը:

Եկեղեցականների քարոզածը հաճախ անհարիր էր ս. Գրքի վարդապետությանը: Նրանք վիուկներ ու կախարդներ փնտրելու պատրվակով իրենց հակառակորդներին ենթարկում էին հավատաքնության ահավոր դատաստանին: Հավատաքնությունը (inquisitio) սկիզբ էր առել ԺԲ դարից: Հավատաքնություն կատարելիս իրավասությունը նախապես պատկանում էր եպիսկոպոսներին, սակայն Իննովկենտիոս պապը 1248 թ. դոմինիկյան միաբանության կրոնավորներին էլ թույլ տվեց այս խնդրով զբաղվել: Միայն Իսպանիայում, օրինակ, տխրահռչակ հավատաքննիչ Թովմաս դե Տորկվեմադան (1420—1498) խարոյկի վրա այրել տվեց ավելի քան 10 հազար հոգու: Այսպիսով քրիստոնեությունը գնալով դադարում էր սիրո կրոն լինելուց և վերածվում ահ ու սարսափ տարածող, ինչպես նաև խեղճերին շահագործող մի կրոնի:

Ցույց տալու համար կաթոլիկ եկեղեցու ունեցած անլուրջ վերաբերմունքը բարեկարգության նկատմամբ արժե անդրադառնալ հետևյալ ցայտուն դեպքին, որը տեղի ունեցավ Լատերանի Ե ժողովի օրերին (1512—1517): Դեռևս 23-ամյա Ալբրեխտ Բրանդեր-

բուրգցին 1513 թ. Մագդեբուրգի արքեպիսկոպոս էր ընտրվել, իսկ մի տարի անց Մայնցի եկեղեցական ավագանու կողմից նա ընտրվեց տեղի արքեպիսկոպոս և ստացավ կայսրընտիր իշխանի հանգամանք։ Տալ տալով ընթացքում Մայնցում երրորդ անգամ էր, որ նոր արքեպիսկոպոս էր պաշտոնի անցնում։ Հռոմի պապից հաստատվելու համար յուրաքանչյուրը պարտավոր էր աթոռի և պալլիումի որպես տուրք 14 հազար դուկատ (ոսկեդրամ) վճարել։ Այդ գումարը գոյանում էր հատկապես դրոշմի արարողության առթիվ գանձված տուրքերից։ Բրանդերբուրգցիները հակառակ էին, որ Ալբրեխտը հաստատվեր որպես արքեպիսկոպոս միաժամանակ երեք թեմերի՝ Բրանդերբուրգի, Հայբերշտադի և Մայնցի։ Եկեղեցական օրենքով էլ մի եկեղեցական իրավունք չունեի մի քանի պաշտոններ վարելու։ Սակայն Լևոն Ժ պապը նյութական և քաղաքական շահերը օրենքից բարձր գնահատելով՝ իր մարդկանց միջոցով առաջարկեց Ալբրեխտի պատգամավորներին, որ 10 հազար դուկատի հավելյալ վճարումով ինքը համաձայն կլինի հաստատելու Ալբրեխտի նոր պաշտոնը և։ Պապական գործարքի պատասխանատուները ցույց տվեցին նաև, թե ինչ ճանապարհով հնարավոր էր հայթայթել հիշյալ գումարը։ Բրանդերբուրգի և Մայնցի վիճակներում «Ներման թղթերը»¹ պետք է վաճառեին, որոնցից գոյացած հասույթի կեսը ս. Պետրոս տաճարի կառուցմանը, իսկ մյուս կեսն էլ Ալբրեխտին պիտի հատկացվեր՝ ի դիմաց ֆուգգերներից² կատարած իր դրամական փոխառության։

Վերոհիշյալ դեպքը, որը ժողովրդային մի մեծ պոռթկումի առիթ տվեց, մի օրինակ է միայն եկեղեցական պաշտոնների ընթացիկ վաճառման, այսինքն՝ սիմոնիականության։

Ժ- դարի վերջերին Եվրոպայում սկիզբ առավ մշակութային և գիտական մի շարժում, որը հայտնի է **հումանիստական շարժում** անունով։ Մեջտեղ եկան հումանիստ մտածողներ, որոնք սկսեցին վերաբժնորել

դասական հնադարի մշակույթը, այսինքն՝ հին լեզուները, արվեստն ու գրականությունը՝ բոլորովին անկախ կրոնական և աստվածաբանական նկատառումներից։ Այս ժամանակաշրջանում գործող հայտնի հումանիստներ էին՝ Լեոնարդո դա Վինչին, Գալենոսը, Լորենցո Վալլան, Նիկոլայոս Կուսանոսը, Նիկոլայոս Կոպեռնիկոսը, Երազմ Ռոթերդամցին, Յոհաննես Ռոյսխինը և ուրիշներ։ Եկեղեցական բարեկարգության հարցում իրենց կարևոր նպաստը բերեցին հումանիստներից **Լորենցո Վալլան** (1405—1457) և **Երազմ Ռոթերդամցին** (1469—1536)։

Լորենցո Վալլան, լինելով հռչակավոր լատինագետ, առաջադեմ փիլիսոփա և ս. Գրոց մասնագետ, 1440 թ. իր մի գրությամբ (*"De Donatone Constantini Imperatoris"*) ապացուցում է Կոստանդիանոս կայսեր տված հրովարտակի կեղծիքը պապի իշխանության և նրա ունեցած կալվածների վերաբերյալ։ Այդ հրովարտակը հայտնի էր «Կոստանդինյան պարզև» անվամբ։ Պապերն իրենք էին հնարել նման շինծու փաստաթղթեր՝ իրենց իշխանության անձեռնմխելիությունը հաստատելու համար³։ Վալլան ենթարկվում է եկեղեցական հալածանքի։

Հումանիստների մեծագույն դեմքն է համարվել **Երազմ Ռոթերդամցին** (Դեսիդերիոս)։ Նա մեծ հեղինակություն է ձեռք բերել ոչ միայն իր հայրենիքում, այլև՝ Գերմանիայում, Ֆրանսիայում և Անգլիայում։ Նա թողել է մի գրվածք «Հիմարության գո-

³ Ապացուցելու համար կաթոլիկ եկեղեցու մենատիրական ձգտումները՝ հարկ ենք համարում մի հատված մեջբերել հիշյալ հրովարտակից, որը իբր թե Կոստանդիանոս կայսրն (306—337) է շնորհել Սեդեքստրոս պապին (314—335) իր կառուցած մայրաքաղաքը՝ Կ. Պոլիս տեղափոխվելուց հետո (330 թ.)։

«Համաձայն մեր ունեցած կայսերական երկրային իշխանության՝ որոշեցինք, որ Ձեր հռոմեական սըրբապնասուրբ Եկեղեցին մեծավ հարգանքով ի պատվի լինի, ինչպես նաև Պետրոս Առաքյալի սրբազնագույն Գահը առավել քան Մեր կայսերական պորությունն ու Մեր երկրային գահը...»

Մենք պատշաճ համարեցինք փոխադրել Մեր իշխանությունն ու Մեր արքայական նստավայրը դեպի Արևելք՝ Մեր անունով մի քաղաք հիմնելով հեռավոր Բյուզանդ գավառում և այնտեղ հաստատելով Մեր գահը, որովհետև այն քաղաքում, ուր քահանայապետն ու քրիստոնեական կրոնի գլուխը երկնային Կայսրից է հաստատված, պարզ է, որ այնտեղ երկրային կայսրն այլևս կարողություն չի ունենա իշխանություն քանեցնելու։ (*Illustrierte kirchengeschichte in Farbe*, Herrsching, 1983, էջ 224—225)։

¹ Ներման թուղթը մեղավորին մեղքերից ազատվելու համար էր վաճառվում։ Սկզբում այն մեղավորին մղում էր իր վրա դրված անաշխարության շրջանում նյութական հատուցում կատարելու, հետագայում, սակայն, կաթոլիկ եկեղեցու համար այն դարձավ շահագործման կարևոր աղբյուր, երբ սկսեց փոխարինել բուն ապաշխարության խորիքին։

² Ֆուգգերները սերում էին Աուգսբուրգ քաղաքի մեծահարուստ վաճառական և դրամատեր Ֆուգգերի ընտանիքից, որոնք երկրում և արտասահմանում կատարում էին դրամական փոխառություններ։

վեստը» վերնագրով, որի մեջ ձաղկում է հիմարության երկրպագուներին, որոնց թվում հատկապես կաթոլիկ հոգևորականներին՝ Հռոմի պապի գլխավորությամբ: 1502 թ. հրատարակել է «Ձեռնարկ» (Enchiridion) անունով մի գրություն, որով, ինչպես ինքն է ասում, ցանկացել է «հակադդել այն մարդկանց սխալին, ովքեր բարեպաշտությունը ծեսերի կամ արտաքին երևույթների կամ էլ վանական կյանքի մեջ էին փնտրում և այդպիսով անտեսում նրա բուն էությունը»⁴:

Երազմի կարևոր գործերից է Նոր Կտակարանի հրատարակությունը հունարեն լեզվով և լատիներեն թարգմանությամբ: Նա համարձակորեն սրբագրել է Վուլգատան: Մարթին Լութերը ս. Գիրքը թարգմանելիս ձեռքի տակ է ունեցել Երազմի թարգմանությունը:

1485 թ. Մայնցի արքեպիսկոպոս Բերթոլդ ֆոն Հեններբերգը հրապարակում է մի հայտարարություն, որով արգելում է սուրբ Գրքի ապատ տպագրությունը, ինչպես նաև հունարենից ու լատիներենից նրա թարգմանությունը շառ աղբատ է արտահայտելու համար սրբազան գրքերի նվիրական իմաստը: Նա նույնիսկ թույլ չի տալիս, որ գիտության և արվեստի գրքերը ուրիշ լեզուներով հրատարակվեն: Այս առթիվ Երազմ Ռոթերդամցին իր «Սրատ վասն ուսմանն քրիստոնեական փիլիսոփայության» գրությամբ հակաձառում է հիշյալ արքեպիսկոպոսին: Ահա մի հատված այդ գրությունից. «Երբ մեկը մեկ Քրիստոսի ոտնահետքն է ցույց տալիս, մենք՝ քրիստոնյաներս, ծնկի գալով պաշտպանում ենք այն: Սակայն ինչո՞ւ չենք նախընտրում մեծարել նրա կենդանի և շնչող կերպարանքը ս. Գրքի մեջ: Երբ մեկը Քրիստոսի պգեստն է ցուցադրում, ուխտի գնալով ինչքա՞ն հեռու ձանապարհ ենք կտրում՝ պարզապես համբուրելու համար այն: Բայց դու եթե նրա բոլոր առտնին գործիքներն էլ ինձ ցույց տաս, ոչինչ չի կարող իմ աչքերի առաջ այնքա՞ն տպավորիչ և այնքա՞ն հարապատ ուրվագծել Քրիստոսին, որքան Ավետարանի մեջ գտնվող նրա պատկերը: ...Ս. Գիրքն է հայտնում քեզ Քրիստոսի կենդանի պատկերը, այսինքն՝ նրա անձը ճիշտ այնպես, ինչպես նա խոսում է, բժշկում, մահանում և հարություն առնում: Դու այլևս չես կարող նրան քո մարմնավոր աչքերով նայել»⁵:

Հիշյալ մտավորական գործիչների թվին

⁴ D. Bernhard Rogge, Das Evangelium in der Verfolgung, Köln, 1925, էջ 19:

⁵ Illustrierte... էջ 432:

պետք է ավելացնել նաև Մարտին Լութերին կանխող եկեղեցական երեք նշանավոր բարեկարգիչների՝ Ջոն Վիկլիֆին (Վալկլիֆ), Յան Հուսին և Սավոնարոլային, որոնք գլորքեր գրելուց բացի, ձեռնամուխ եղան քարոզության և ժողովրդի լուսավորության կարևոր գործին: Հակառակ նրանց աստվածաբանական երբեմն ծայրահեղ կամ մեկ կոտոր թվացող մտքերին, պետք է ընդունել, որ նրանց գլխավոր և անկեղծ մտահոգությունն է եղել Եկեղեցու բարեկարգության հարցը: Նրանք գործել են անտեսելով իրենց կյանքին սպառնացող բոլոր վտանգները և հող են նախապատրաստել եկեղեցական հետագա բարեկարգության համար: Այս տեսակետից հատկանշական է նրանցից մեկի՝ Ջոն Վիկլիֆի հետևյալ խոսքը. «Նրանք, ովքեր մարդկանց կողմից սահմանված բանադրանքի պատճառով հրաժարվում են քարոզչությունից, այդպիսիներն արդեն իսկ բանադրված են և վերջին Դատաստանի օրը Աստուծո դավաճանները պիտի կոչվեն»⁶:

Ջոն Վիկլիֆը (մոտ. 1330—1384) անգլիացի նշանավոր փիլիսոփա, աստվածաբան և բարեկարգիչ էր: Լինելով եկեղեցական և քաջածանոթ ս. Գրքի ոգուն՝ նա ջատագովում էր կամավոր աղքատությունը և սակավապետությունը: Օքսֆորդում նա դասավանդել է աստվածաբանություն:

Վիկլիֆը խստորեն քննադատում էր պապական ընչաքաղցությունն ու եկեղեցականների աշխարհիկ իշխանությունն ձեռք բերելու ձգտումը: Նա անարժեք և ավելորդ էր համարում եկեղեցական այն բոլոր ավանդույթները, որոնք անհամատեղելի էին ս. Գրքի հետ: Ըստ նրա, Եկեղեցու իսկական գլուխը Քրիստոսն էր, և դրա համար էլ ոչնչով արդարանալի չէր Հռոմի պապի հավակնությունը՝ լինելու գլուխը քրիստոնեական Եկեղեցու, մանավանդ, որ Եկեղեցին էլ իր հերթին 1054 թ. տարակարծությունների հետևանքով երկու մասի էր բաժանված՝ արևելյան-բյուզանդական և հռոմեական-կաթոլիկ, իսկ վերջինս էլ իր մեջ բաժանումներ ուներ. Հռոմում և Ալիսյոնում տարբեր պապեր էին իշխում Ուրբանոս Զ-ը և Կղեմես Է-ն:

Վիկլիֆը դեմ էր քահանաների ամուրիության, մեղքեր կապելու և արձակելու նրանց իրավասության, ինչպես նաև հավատացյալների և Աստծու միջև միջնորդության: Նա հակառակ էր կաթոլիկ Եկեղեցու ընդունած «գոյացափոխության» վարդապետությանը: Գրիգոր ԺԱ պապը (1370—1378), ծանո-

⁶ Անդ, էջ 337:

թանալով նրա «Քաղաքացիական իշխանության մասին» (De civil dominio) գրքին, արգելեց այն և բանադրեց հեղինակին:

1382 թ. Լոնդոնում գումարված եկեղեցական մի ժողովում Վիկլիֆի ուսմունքը դատապարտվեց, սակայն նա ապրեցի կուսակիցների ջնդրիվ ապառվեց մահապատժից: Նա թողել է բազմաթիվ գրվածքներ և ավելի քան 300 հոգեշունչ քարոզներ: Նրա կարևոր գործերից է նաև 1383 թ. հրատարակված Նոր Կտակարանի անգլերեն թարգմանությունը:

1415 թ. մայիսի 4-ին, Կոնստանցի ժողովում, Վիկլիֆը, հետ մահու, պաշտոնապես հերետիկոս հռչակվեց: Եկեղեցին նրա ուկորները հանել տվեց գերեզմանից և թափեց Լուտերվորթի մոտից անցնող գետակի մեջ: Նրա հետևորդները ծանր հալածանքի ենթարկվեցին, բայց նրա ուսմունքը շարունակեց ապրել բոհեմիական Հուսյանների մոտ:

Յան (Յոհան) Հուս (1369—1415): Բոհեմիացի եկեղեցական, հռետոր և բարեկարգիչ: Ծնվել է Բոհեմիայի հարավում գտնվող Հուսինեց գյուղաքաղաքում, որի համար էլ ստացել է Հուս անունը: Պրագայի համալսարանն ավարտելուց հետո նա ձեռնադրվել է քահանա և նշանակվել Բեթլեհեմ անունով մի մատռան քարույի: Նա միաժամանակ եղել է Բոհեմիայի Սոֆիա թագուհու խոստովանահայրը:

Աննա Բոհեմիացու հետ (1382 թ.) Անգլիայի Ռիչարդ Բ թագավորի ամուսնության շնորհիվ, Անգլիայի և Բոհեմիայի միջև բարեկամական սերտ հարաբերություններ են հաստատվում, որով բազմաթիվ չեխ երիտասարդներ առիթ են ունենում ուսանելու Անգլիայում: Նրանք հայրենիք վերադառնալով՝ իրենց հետ բերում են Ջոն Վիկլիֆի գրությունները: Նրանց մեջ էր Հերոնիմոս Ֆաուլֆիլդը, որը մտերմացել էր Հուսի հետ:

Հուսը թեև ապրվել էր Վիկլիֆի գրություններից, սակայն ամեն ինչ նրանից չէր ընդօրինակում. որոշ տեղեր, ինչպես «գոյացափոխության» հարցում, նա համաձայն չէր Վիկլիֆի հետ:

Բարեկարգության պահանջը հետպիեռն սկսել էր վգայի դառնալ նաև Պրագայում: Հուսը լծվում էր աշխատանքի, քննադատում էր Հռոմի պապի բռնակալությունը, մերժում էր Ավետարանի ոգուն խորթ համարվող եկեղեցական ավանդություններն ու օրենքները: Ըստ նրա, պապական հեղինակությունը, ապավինելով իր քաղաքական ուժին և իշխանությանը, չի կարող ներկայացնել Քրիստոսի հիմնած ճշմարիտ Եկեղեցին: Աստծուն հնազանդվող հավատացյալներն են կալմուն

Եկեղեցին և ոչ թե պապական իշխանությանը ենթարկվող մարդիկ:

Հուսի պայքարը անողոր էր նաև այսպես կոչված «Ներման թղթերի» վաճառքի⁷ և սղրբերի մատուցներին մատուցվող ծայրահեղ պաշտամունքի դեմ: 1413 թ. նա հրատարակեց իր «Եկեղեցվո մասին» (De Ecclesia) գիրքը, որի մեջ ամփոփել էր իր բարենորոգչական գաղափարները: Նա կատարեց նաև թարգմանություններ և Վիկլիֆի գործերն ու ամբողջ ա. Գիրքը չեխերենի վերածեց:

Կաթոլիկ Եկեղեցին Բոհեմիայում նախ արգելեց Վիկլիֆի գրությունները և սպառնաց խարույկի վրա բարձրացնել բոլոր ներանց, ովքեր կհամարձակվեն կարդալ Վիկլիֆի գրքերը կամ տարածել նրա գաղափարները: Այս սկսեց իր պայքարը Հուսի դեմ: Ալեքսանդր Ե պապը քարոզելու իրավունքից զրկեց Հուսին, բայց նա չհնազանդվեց պապին:

Հուսը ուներ բազմաթիվ հետևորդներ, սակայն Եկեղեցու և հատկապես Պրագայում ապրող գերմանացիների պայքարը շատ ուժեղ էր նրա դեմ, որովհետև նա ուզում էր ազգային նկարագիր տալ իր Եկեղեցուն և որևէ արարողություն կամ դաստիարակչական գործունեություն ժողովրդի մեջ փորձում էր ընդհանուրին հասկանալի ու մատչելի լեզվով ծավալել:

Բոհեմիայի Վենցել թագավորը (1361—1414) թեև ուզում էր պաշտպանել Հուսին ընդդեմ պապի բանադրանքների, բայց նրան չէր կարելի վստահել, որովհետև նա հռոմ կրքերով տարված մի անձնավորություն էր, այն աստիճան, որ իր խոստովանահոր՝ Յոհան Նեպոմուկցուն անձամբ խոշտանգել էր և նրա ոտքերն ու ձեռքերը կապելով՝ Մոլդաու (Վլտավա) գետն էր գցել նրան:

⁷ Ահա մի հատված Հուսի ընդդեմ «Ներման թղթերի» վաճառքի խոսքերից. «Աշխարհի խաբեբաներն ու կեղծ քահանաները անամոթաբար քարոզում են, թե ով որ դրամ տա՝ թողություն կստանա իր մեղքերից: Ճիշտ չի կարող լինել, որ մեկը միայն դրամ տալով և իր գործած հանցանքների համար առանց արդյունաբեր վոջման իր մահից հետո անմիջապես երկինք գնա, իսկ մեկ ուրիշը, որ ոչինչ չի վճարել, իր մեղքերի համար մեծագույն տանջանք կրի: Նման մի ուսմունք արդյոք հեշտությամբ մեջտեղից չի՞ վերացնի Աստծո արդարությունը, երբ յուրաքանչյուր ոք, որ դրամ ունի, իր համար ներման մի թուղթ գնելով՝ իր մահից հետո կարողանա, առանց նեղության, ուղղակի երկինք գնալ» (Michael Freud, Deutsche Geschichte, Bertelsmann Lexikon-Verlag, 1973, էջ 257):

Գերմանիայի կայսր Սիգիսմունդը ուզում էր սիրաշահել Հուսին, որպեսզի այդ միջոցով շահի չեխերի համակրությունը և իր եղբոր՝ Վենցել թագավորի մահից հետո ինքն իշխի նաև Բոհեմիայի վրա: Այս պատճառով էլ նա ապահովագիր տվեց Հուսին, որ գա Գերմանիա և մասնակցի Կոնստանցի նշանավոր ժողովին (1414—1418):

Սույն ժողովի նպատակն էր վերացնել 1378 թ. հռոմեական կաթոլիկ Եկեղեցու վարչական հերձվածը: Սիգիսմունդի պնդումով Պիլայում նստող Հովհաննես ԻԳ պապը կոչ արեց եկեղեցական ավագանուն և իշխաններին հավաքվել Կոնստանցիայում: Ժողովին ներկա էին 33 կարդինալներ, 300 եպիսկոպոսներ, 150 իշխաններ և կոմսեր, մոտավորապես 2000 համալսարանականներ, վարդապետներ, վանականներ, ազնվականներ և արտասահմանյան պատգամավորներ: Օրակարգի գլխավոր հարցերն էին.

ա. Եկեղեցու միության հարցը
(causa unionis).

բ. Բարեկարգության հարցը
(causa reformationis)

գ. Հավատո և կարգի հարցեր
(causa fidei)

Վերջին հարցերի մեջ մտնում էին Ջոն Վիկլիֆի գործերի քննարկումը, ինչպես նաև Յան Հուսի ու նրա համախոհների հարցաքննությունը:

Հուլիս ներկայացավ հիշյալ ժողովին, սակայն նրա թշնամիները նրա դեմ բազմաթիվ 'սուտ վկայություններ բերելով՝ պահանջեցին, որ նա դատապարտվի: Հակառակ Սիգիսմունդ կայսեր ապահովագրին՝ Հուսին ութ ամիս բանտում պահեցին: Բոհեմիայի ժողովուրդը ընդվզեց այս անիրավության դեմ և պահանջեց իր վարդապետի վերադարձը: Իսկ Հուլիս պնդում էր, որ ս. Գրքի միջոցով ապացուցեն իր մոլորությունները: Ժողովի ընթացքում Հուսից պահանջեցին հրաժարվել իր գաղափարներից և առիթ չտվեցին նրան պաշտպանվելու: 1415 թ. հուլիսի 6-ին, ճիշտ իր ծննդյան տարեդարձի օրը, նրան բարձրացրին խարույկի վրա⁸:

⁸ Այս մասին, օգտվելով օտար աղբյուրներից, խաչատուր Աբովյանը իր «Համառոտ պատմության կենաց եւ մարտիրոսական մահուան մագիստրոսի Յովհաննու Հուսի» գրության մեջ մեզ տալիս է այնպիսի մի նկարագրական, որով կարողանում ենք գաղափար կազմել կաթոլիկ Եկեղեցու գործադրած քստմեղի հալածանքների մասին ընդդեմ բոլոր ազատ մտածողների և առաջադիմական գաղափարներով տոգորված մարդկանց: (Տես Խ. Աբովյան, Երկերի լիակատար ժողովածու, Ինիզերորդ հատոր, Երևան, 1950, էջ 408—412):

Հուսի աշակերտն ու մտերիմը՝ Հերոնիմոս Պրագացին, որ նույնիսկ Կոնստանց էր եկել, ճնշումների ներքո հրաժարվեց իր համոզումներից, սակայն հետո խղճահարվելով՝ վերադարձավ իր նախկին դավանանքին և դրա համար էլ 1416 թ. Հուսի նման դատապարտվեց և հրկիզվեց:

Շնորհիվ իր քարոզների և չեխերեն գրված իր գրքերի՝ Հուլիս մեծ ժողովորդականություն էր շահել Բոհեմիայում: Երբ նրա անագորույն մահվան լուրը տարածվեց, Բոհեմիացիք վայրացած ապստամբություն բարձրացրին և սկսեցին հալածել կաթոլիկ եկեղեցականներին ու ազնվականներին: Այս ապստամբությունը գնալով սաստկացավ և ստացավ «Հուլայան շարժում» անունը: 1419 թ. խռովահույզ ամբոխը սկսեց քարոքանդանել եկեղեցիներն ու վանքերը, ինչպես նաև հալածել գերմանացիներին:

Ապստամբներին հաջողվեց գրավել քաղաքային խորհրդարանի շենքը: Նրանք խորհրդի անդամներին լուսամուտներից ցած գցեցին: Նրանք հրաժարվեցին ճանաչել Սիգիսմունդ կայսրին որպես Բոհեմիայի թագավոր: Այս արյունալի շարժումը շարունակվեց մինչև 1436 թ.:

Հռոմի պապը Հուլայանների դեմ խաչակրաց արշավանք հայտարարեց: Այդ արշավանքը գլխավորում էր Սիգիսմունդ կայսրը, որին միացել էին Եվրոպայի զանազան շքրջաններից եկած ասպետներ: Կռիվների ընթացքում Հուլայանները մեծ հաջողությամբ կարողացան դիմադրել թշնամուն:

1420—1431 թթ. գերմանացիները հինգ անգամ խաչակրաց արշավանք կազմակերպեցին Հուլայանների դեմ: Վերջիններս Յան Ժիշկայի գլխավորությամբ խիստ խորեն մարտնչում էին ներխուժողների դեմ:

Հուլայանների մեջ երկու խմբավորում առաջացավ. առաջին խմբավորմանը մաս էին կազմում չափավորները, որոնք բաղկացած էին համալսարանականներից, քաղաքաբնակներից և ազնվականներից: Սրանք կոչվում էին նաև բաժակյաններ (kalixtiner, քանի որ ս. Հաղորդությունը պոպո կերպարանքով, այսինքն՝ մարմնով և արյամբ միասին մատակարարում էին հավատացյալներին, ի տարբերություն կաթոլիկների, որոնք սովորություն էին դարձրել միայն մարմնով ս. Հաղորդություն տալ): Երկրորդ խմբավորման մաս կազմողները կոչվում էին Թալբորականներ (իրենց հիմնած Թալբոր քաղաքի անունով): Սրանք բոլորովին անվիշող դիրք էին բռնել հռոմեական կաթոլիկ Եկեղեցու նկատմամբ: Սրանց թվում էին գյուղացիներն ու արհեստավորները:

Չափավորները ուզում էին համաձայնու-

թյան գալ գերմանացիների հետ. նրանք ընդունում էին Սիգիսմունդ կայսեր հեղինակությունը, իսկ կայսրն էլ համաձայնվել էր ճանաչել չեխական Եկեղեցու անկախությունը: Այս պատճառով Թաթարականների և չափավորների միջև գոտություն առաջացավ, նրանք սկսեցին կռվել իրար դեմ, և այսպիսով ձախողության մատնվեց Հուսյան շարժումը:

Որպես եղրակացություն՝ պետք է ասել, որ Յան Հուսը իր սկսած շարժումով գործնականապես կանխեց Մարտին Լութերին: Խարույկի վրա հրկիպվելիս նա արդեն հետևյալ գուշակությունն էր արել ապագա բարեկարգիչի մասին. «Դուք այժմ խորովում եք սագ («Հուս» նշանակում է սագ), սակայն հարյուր տարի հետո դուք պիտի լսեք երգը մի կարապի, դուք պիտի հանդուրժեք նրան, և նա էլ, եթե Աստված կամենա, հաստատ պիտի մնա»⁹:

Հերոնիմոս (Ժերոնիմո) Սավոնարոլան (1452—1498) անդամ է Ֆլորենցիայի դոմինիկյան միաբանության: Նա քարոզում էր ապաշխարություն և եկեղեցական կարգացում կանոնաց բարեկարգություն: Ի տարբերություն Վիկտորի կամ Հուսի, Սավոնարոլան, դատապարտելով հանդերձ կրոնական բարքերի ապականությունը, չցանկացավ երբեք դուրս գալ հռոմեական կաթոլիկ Եկեղեցու հաղորդությունից կամ էլ բաժանվել պապականությունից:

Սավոնարոլան ինքն իրեն համարում էր Աստծուց ուղարկված մի մարգարե և պահանջում էր վերացնել բարոյական ապականությունը Եկեղեցու և ժողովրդի միջից: Նրա ազդեցությունն ու արժանիքները այնքան մեծ էին, որ 1491 թ. ս. Մարկոս մենաստանի վանականները իրենց վանքի վանահայր նշանակեցին նրան: Այս ժամանակաշրջանում նա բախումներ ունեցավ Ֆլորենցիայի կառավարիչ Լորենցոյի հետ, որը սերում էր մեդիչիների հայտնի գերդաստանից: Սրա մահը Սավոնարոլան համարեց որպես աստվածային մի պատիժ, որից հետո ինքը դարձավ Ֆլորենցիայի ամենապղծեցիկ դեմքը:

Լորենցոյի որդու՝ Պետրոս Մեդիչիի փախուստից հետո, Սավոնարոլան մի ժողով գումարեց Ֆլորենցիայի Մայր տաճարում: Ժողովում նա Հիսուս Քրիստոսին հռչակեց Ֆլորենցիայի թագավոր՝ այսպիսով հիմք դնելով աստվածայետական մի հասարակարգի: Այս առիթով, սակայն, նա ստիպված ե-

ղավ մխրճվել քաղաքական խնդիրների մեջ, որոնց դառն հետևանքները շուտով կրեց:

Ալեքսանդր 2 վատահամբավ պապը (1492—1503) ուլեց սիրաշահել Սավոնարոլային և նրան խոստացավ կարդինալական պատիվ, պայմանով, որ դադարեցնի իր քննադատությունները: Նա խիստ վիրավորվելով մերժեց պապի առաջարկը:

Այնվականներից ոմանք և Մեդիչիի կուսակիցները գաղտնի պատրաստություն էին տեսնում խորտակելու համար Սավոնարոլայի ձեռք բերած ազդեցությունը: Ալեքսանդր 2 պապն էլ, նրան չեղդացնելու նպատակով, Հռոմ հրավիրեց: Սավոնարոլան չհնազանդվեց պապին: Վերջինս արգելեց նրան քարոզել: Սակայն նա այս հրահանգին էլ չենթարկվեց, ավելին, պահանջեց, որ եկեղեցական մի ժողով գումարվի և պաշտոնակ արվի պապը իր գործած խայտառակությունների համար:

1497 թ. պապն սպառնաց Ֆլորենցիայի սենատին, որ, եթե Սավոնարոլային չռեցնի, ապա ինքը ամբողջ քաղաքը կտրկի եկեղեցական պաշտամունքներից և հոգևոր մատակարարությունից, այսինքն՝ եկեղեցական արգելք (interdikt) կդնի քաղաքի վրա: Սենատում Սավոնարոլայի հակառակորդները բազմացել էին, ժողովուրդն էլ խռովության մեջ էր: 1498 թ. ապրիլի 8-ի գիշերը հակառակորդները խուժեցին ս. Մարկոսի մենաստանը և ձերբակալելով Սավոնարոլային՝ բանտ գցեցին և սարսափելի տանջանքների ենթարկեցին նրան: Նրա դատավարությունը տևեց վեց շաբաթ: Պապը դատավորին ասել էր. «Եթե նա նույնիսկ Հովհաննես Մկրտիչը լինի, միևնույն է, պետք է մեռնի»¹⁰: Նույն տարվա մայիսի 23-ին Սավոնարոլային հրկիպեցին Ֆլորենցիայի գլխավոր հրապարակի վրա, ժողովրդի առաջ, իր երկու միաբանակիցների՝ Դոմինիկոսի և Սեդրեստրոսի հետ: Դրանից քիչ առաջ, երբ նրան մերկացնում էին իր քահանայական զգեստներից, մի եպիսկոպոս, մոտենալով ասաց նրան. «Ես քեզ բաժանում եմ Եկեղեցուց»: Իսկ նա պատասխանեց. «Բայց սուկ պինվորա՛յ Եկեղեցուց և ոչ հաղթանակից»¹¹:

Մահվանից մեկ օր առաջ Սավոնարոլան գրել-վերջացրել էր իր սաղմոսաց մեկնությունը, որը հետագայում Լութերի կողմից գերմաներեն թարգմանվեց:

Այսօր հռոմեական կաթոլիկ Եկեղեցին, ընդունելով հանդերձ Սավոնարոլայի դրական

¹⁰ D. Bernhard Rogge, Das Evangelium in der Verfolgung, Köln, 1925, էջ 65:

¹¹ Մեդիսեդեկ եպո. Մուլտառեանց, Պատմություն Բրիտանական Եկեղեցու, 1898, էջ 263:

⁹ Heiko A. Oberman, Luther, Berlin, 1983, էջ 63—64:

դիրքորոշումը Եկեղեցու և եկեղեցիների նկատմամբ, չի ուզում դասել նրան իր նահատակների շարքը՝ պապի հանդեպ նրա անհնազանդությունը համարելով կարևոր թերություն¹²:

Ահա մի հատված Սավոնարոլայի քարոզությունից. «Իմ եղբայրներ, սա՛ է Բաբելոն քաղաքը, հիմարների և չարգործների քաղաքը, որ Աստված պիտի կործանի: Գնացե՛ք Հռոմ, այնտեղ բովանդակ քրիստոնեության համար մեծամեծ եպիսկոպոսներ պարապում են բանաստեղծությամբ և պերճախոսությամբ: Նրանց ձեռքում դուք կը գտնեք Օրատորիոսի, Վերգիլիոսի և Կիկերոնի գլխավոր երկերը: Դրանցով են նրանք ուսանում հոգևոր տեսչությունը: Նրանք իրենց Եկեղեցին կառավարում են աստղաբաշխների միջնորդությամբ, որոնք ծանուցում են նրանց այն նշանավոր ժամը, թե ե՛րբ պետք է գնան ձիեր փորձելու...: Նը-

րանց Եկեղեցին գեղեցիկ է իր արտաքին տեսքով՝ իր վարդերով և դրվագներով, շքեղ հանդեսներով, ոսկյա և արծաթյա աշտանակներով, ճոխ սկիհներով, ոսկեդրվագ թագերով, թանկագին քարերով. բայց պետք է ասել ձեզ, որ նախնական Եկեղեցու մեջ սկիհները փայտից էին, իսկ եպիսկոպոսները՝ ոսկուց: Այսօր բոլորովին հակառակն ենք տեսնում: Հռոմի եպիսկոպոսները մեր մեջ բերեցին դժոխքի հանդեսները: Նրանք այլևս չեն հավատում Աստծուն և ծիծաղում են մեր սուրբ կրոնի խորհուրդների վրա...: Ո՛ր ես դու, ո՛վ Տեր, ինչո՞ւ ես քնում, զարթնիր և եկ ապատելու քո Եկեղեցին դեվերի ձեռքից, բռնավորների ձեռքից, վատ քահանաներից: Միթե մոռացել ես քո Եկեղեցին, միթե այլևս չե՛ս սիրում այն, շտապիր պատժելու նրանց, որպեսպի մենք էլ շտապենք և դառնանք դեպի քեզ»¹³:

¹² Illustrierte... էջ 963.

¹³ Մեքլիսեղեկ եպս., նույնը, էջ 263—264 (մեքերումի լեզուն վերածել ենք արևելահայերենի):

